



МОНГОЛ УЛСЫН ЕРӨНХИЙ САЙД
ЛУВСАННАМСРАЙН
ОЮУН-ЭРДЭНЭ ТАНАА

МОНГОЛ УЛСЫН ИХ ХУРЛЫН ГИШҮҮНИЙ
АСУУЛГА

14201 Улаанбаатар хот, Сүхбаатар дүүрэг
Жанжин Д.Сүхбаатарын талбай 1, Төрийн ордон
Утас: 26-70-16, Факс: 32-70-16
E-mail: stategreatkhural@parliament.mn
http://www.parliament.mn

2011.02.09 № 03

Асуулга тавьж, шаардлага
хүргүүлэх тухай

Монгол Улсын Их Хурлаас 2019 оны 11 дүгээр сарын 21-ний өдөр "Оюу толгой ордын ашиглалтад Монгол Улсын эрх ашгийг хангуулах тухай" 92 дугаар тогтоолыг баталсан.

Монгол Улсын Засгийн газар болон Айвенхоу майнз Монголиа Инк ХХК, Айвенхоу майнз Лтд, Рио Тинто Интернэшнл Холдингс Лтд компани хооронд байгуулсан гэрээнүүдийг Монгол Улсын хууль тогтоомжтой уялдуулан сайжруулах чиглэлээр цогц арга хэмжээ авах, шаардлагатай тохиолдолд олон улсад хүлээн зөвшөөрөгдсөн хараат бус зөвлөх үйлчилгээ авах, 2015 оны 05 дугаар сарын 18-ны өдөр байгуулсан "Оюу толгойн далд уурхайн бүтээн байгуулалт, санхүүжилтийн төлөвлөгөө" болон "Оюу толгойн далд уурхайн бүтээн байгуулалт, санхүүжилтийн нэмэлт төлөвлөгөө"-г Монгол Улсын эрх ашиг, хууль тогтоомжид нийцүүлэн сайжруулах, Оюу толгой төслөөс хүртэх Монголын талын үр өгөөжийг нэмэгдүүлэх талаар боломжит хувилбаруудыг судлан шийдвэрлэх, шаардлагатай тохиолдолд холбогдох хууль тогтоомжид өөрчлөлт оруулах тухай санал боловсруулан Улсын Их Хуралд танилцуулах зэрэг тодорхой чиглэлүүдийг өгсөн.

Сүүлийн үед Оюу толгой төслөөс Монголын талын үр өгөөж хүртэх хугацаа олон жилээр хойшлоод зогсохгүй, урьдчилсан байдлаар далд уурхай ашиглалтад ороод 2051 он хүртэл Монгол Улс ногдол ашиг авахгүй, цаашлаад 22 тэрбум ам.долларын өртэй үлдэх тооцоог Рио Тинто компани Монгол Улсын Засгийн газарт ирүүлсэн талаар мэдээлэл гарах боллоо.

Улсын Их Хурлын гишүүн би Монгол Улсын Их Хурлын тухай хуулийн 8 дугаар зүйлийн 8.1.13 дахь заалт, 39 дүгээр зүйлийн 39.2 дахь хэсгийг тус тус үндэслэн Монгол Улсын Ерөнхий сайд Танд дараах асуулгыг тавьж, шаардлагыг хүргүүлж байна.

1.Монгол Улсын Их Хурлаас 2019 оны 11 дүгээр сарын 21-ний өдөр баталсан "Оюу толгой ордын ашиглалтад Монгол Улсын эрх ашгийг хангуулах тухай" 92 дугаар тогтоолын хэрэгжилтийг заалт тус бүрээр гаргаж ирүүлэх;

2.Айвенхоу майнз Монголиа Инк ХХК, Айвенхоу майнз Лтд, Рио Тинто Интернэшнл Холдингс Лтд компани нь Монгол Улсын Засгийн газрын эсрэг Их Британи Умард Ирландын Нэгдсэн Вант Улсын Лондон хотын Арбитрын шүүхэд хандан нэхэмжлэл гаргасан бөгөөд нэхэмжлэлийн талаар хариу тайлбар хүргүүлэх, сөрөг нэхэмжлэл гаргах хугацаа нь энэ оны 02 дугаар сарын 21-ний өдрөөр

2020000107


дуусгавар болох гэж байгаа тухай албан бус мэдээлэл байгаа тул хэрэв уг мэдээлэл үнэн бол хариу тайлбар, сөрөг нэхэмжлэлийг яаралтай гаргах, энэ талаар авч хэрэгжүүлсэн арга хэмжээний тухай;

3.Оюу толгойн хөрөнгө оруулалтын гэрээ болон далд уурхайн бүтээн байгуулалтын санхүүжилтийн төлөвлөгөөг байгуулахдаа Монголын талаас албан тушаалын байдал, эрх нөлөөгөө ашиглан өөртөө болон бусдад давуу байдал үүсгэсэн байж болзошгүй асуудлаар Америкийн Нэгдсэн Улсын Нью-Йорк мужийн Дээд шүүхэд гаргаад байсан нэхэмжлэлийг сэргээн шалгуулах арга хэмжээг яаралтай авч хэрэгжүүлэх, энэ талаар авч хэрэгжүүлсэн арга хэмжээний тухай;

4.Оюу толгойн хөрөнгө оруулалтын гэрээ болон далд уурхайн бүтээн байгуулалтын санхүүжилтийн төлөвлөгөөтэй холбоотой асуудлаар Америкийн Нэгдсэн Улсын Нью-Йорк мужийн Дээд шүүхэд товлогдоод байсан хурлыг хэний санаачлагаар цуцалсан талаар.

Иймд шаардлагын талаар тодорхой арга хэмжээг авч, асуулгын хариуг Монгол Улсын Их Хурлын тухай хуулийн 39 дүгээр зүйлийн 39.3 дахь хэсэгт заасан хугацаанд ирүүлэхийг Танаас хүсье.

УЛСЫН ИХ ХУРЛЫН ГИШҮҮН



С.БЯМБАЦОГТ

Б.БАТ-ЭРДЭНЭ

Х.БОЛОРЧУЛУУН

С.ГАНБААТАР

Ж.МӨНХБАТ

2020000107